

清容居士集

冊二

卷之四

四

何容居士集卷第二

元 袁 桷 譔

騷辭附

愍誓 哀謝先生

受穆清之元陽兮一精白以抗修闔闔睽睽其初麗兮執正辭以告猷黯朱光
而不燭兮妖羣立以縱恣飾詩禮以逞誣兮曰余將焉所詣胸臆結約而莫達
兮史告之以寡言心屏營以靡置兮導廬旆而爲之先揭德華之魁壘兮勵來
者之前一成旅以興邦兮仡然莫余敢擬州纍纍以十百兮夫何寬衣而廣
袂燃積薪以逞安兮羣豢食而自戲竭精液復疾呼兮卒莫能進其詞振飄風
於林籟兮葉脫故而懷新衆喁喁以雜居兮審獨立而號呻矢危忱於帝闈兮
星委地以如珮何執愚之慎矜兮守隘說於顛沛持空薄之一髮兮振千鈞於
層冰力弗勝而殆兮猶夸夫守道之經企女紀之傾輪兮極迅翼以恣往九疑
靈妃慘玉容兮鏗鼓瑟其音蕩重華倏焉以冥邈兮凜舊德之日喪乘桴游於

中流兮海若息波以竚望棹夷猶而靡行兮羌何爲乎此路晝然揚靈窮晦冥
兮朱鬣乘旗挾以震怒澎湃蕩簸激回渦兮爰深逝以歔歔懷縮慙而失據兮
寧忍歸夫故居死無能終報兮生莫知其曷圖貴化人之冲漠兮絜肥遯以自
遜蒙垢紛爲汙濁兮薄日月之吐吞擊門竇於荒滅兮屏精明以黜聞超飛霞
而上征兮遇武夷之神君逝者翳于山丘兮夸誕逐其營魂覽三聖之古簡兮
宣尼實爲之彌縫謂道無古今兮孰與之傳虛九九而內明兮剛柔錯焉以敷
宣翫朝步之奇文兮握奇五以黜煩建中極而滅端兮成品物之自然湛然一
以貫兮曷知其後先數京垓以成變兮迎拒之而莫偏斂莫知其跡兮爲道之
全夫形旣不可以久擅兮神與之爲橐籥迫朝逐而日騁兮引正命以自絕棘
棧棧于車道兮精離榦以蕭屑秋陰慙其淒骨兮熠螢光之明滅手三秀而不
忍茹兮腹殷殷其雷裂奄兮愀兮忽以放逸兮何昭昭其章徹 亂曰元神凌
兢兮命壽不得長闡茸曼衍兮旣樂且康衆皆馴帖兮靈胡然而秉方擷雲英
兮微光佩雜芳兮彌章駕赤鯨兮騰驤絕六虛兮放八荒注北斗爲漿兮內熱

不敢嘗林有桂蘭兮水有鰻魴所思弗見兮奚故鄉絜眇風兮樂未央吁嗟逆
化兮何怛傷

廣招

深寧先生乘虬上征江海殄瘁湘纍遺痛千載猶一日也柳車爰行瞻望永隔
門人袁桷竊取宋玉招魂述廣招以反其義其詞曰

竊獨悲此翳濁兮身鞠恧而莫明服三后之貞則兮秉忠純以內兢繩古義以
自抗兮懍微躬之莫勝懼天命之不吾與兮晚更號以深寧委靈魄於玄宅兮
挾清神以上征重華慘其無容兮矚下矩之險隘侈九夷之曠邈兮申前聖之
遺戒一去而莫返兮八靈孰能以震馘乃命小臣戴縱秉旄注精高冥而下招
曰茫茫封丘屬豕萃只炳靈奔飛杳交會只嬋嫫清芬孰返旆只縱橫幽房雜
厖怪只魂兮歸來其益以駭只東門熒煌平蕪層陰只靈宮紫芝萎以泯只流
鈴搖空訴夸淫只玄蛇蒼鼠若擾馴只魂兮歸來激越吟只蹠踐蹂躪白蟬飛
只滅方鑿迂傳致以肥只鬬青綴白眩纖奇只折楊黃華司體儀只魂兮歸來

彼相疑只沃隰修畛鞠薺茂只狂夫冶游胡慙後只南山白石曷以永年只式
顓其薇悵周原只歸來歸來其孰能床魂只愁雲旋宇陰籟振幕只素空霏塵
清晝激電只虎雖黃目屏陳設只精鑿後置爍蠹施張只伊鳴仰天雜猖狂只
甘胫恣睢禮不可防只魂兮歸來悉無以當只魂兮乘桴登瀛壖只海觀日浴
爛紅殷只皙容長裾襲古先只漆書竹簡遂研鑽只崑崙穹隆疑有至人只妙
顏紫蕤休德日新只吐珍納和與道爲鄰只雕題祝髮禮讓興仁只桂蠹咀吞
味芳辛只幽蘅嘉芷佩孔文只相羊湘纍胙若存只承挹清塵徘徊翩翩只天
光淳耀會弁森扈只肅容展威受多祐只斬凡破觚斯黃輔只龍圖昭回布高
矩只開陰蔽陽庶類蕃嘉只捫歷箕尾建崇牙只翦理姦巫靜無譁只照示下
土循義媧只河公海神瑰以迅只貝宮鮫室祕怪雜孕只瓊英琪柯錯繽紛只
鞭龍誅蛟濡澤湛潤只魂兮遠游戢凌紊只揚歌舒嘯化幽憤只重曰嗟所思
之不得見兮儼冰雪之遺容緊遲遲而容與兮松柏日其蔥蘢悵幢帷之咫尺
兮長虬脫焉以追風蛻塵居之險艱兮捨崇蘭之新封塤篴迭其和奏兮聯雲

車以陪乘粲琳琅之遺編兮俾泯絕之足證匪離羣以自絜兮誠不忍夫驚騁
超整駕以言從兮懼見譏乎後聖揖虛漠而言旋兮耕書田以振厲諒神明不
吾欺兮庶終承乎嘉惠千秋兮靡長白雲兮相望魂兮歸來其毋我忘也

七觀

翰林先生納榮息機謝白玉之堂將歸于麻源之山房越公孫懷牘濡穎託物
喻志考圖審曲若鑑之納視言忘而意消類別而理備有郢大夫癯然褐衣目
不接乎黼黻耳無聞於律呂輾而言曰登高能賦淫曼荒忽智專者魂強形滯
者物逐昔吳州來觀詩東魯言有度徵有據厲階於枚生濫觴於曹王先生楚
產也雲夢汗漫巫峽巒岈胸藏腹蟠公孫不足以教我先生殺青南山積簡羽
陵若網有網若墨有繩舉凡暢微我其聆諸

越公孫曰太素烟煴清濁奠儀雨風露雷動植攸孳辨方審良民用不疵六氣
以沴日天其世彼諄諄者皇曰汝命實長厥土燥剛相其溫涼我生命在天順
以受年巖居谷飲中道以隕執書以觀有涕洟瀾陋彭鏗之逆理兮何恣縱而

益顏言技可以進道今吾當由是以返觀納腸補藏潛忍莫竟石立土踊宇彗
迂逆吾猶以爲天地之病也修身俟命道之大經先生之正也大夫曰神之所
行何體何方拘者爲儒請更端以告僕夫

越公孫曰靈曜宣精五紀順明察幽考微法天以行形氣芸芸吉凶卑高觀象
以分輜兮靈根感不以言由動彰靜百神受祜虛者爲音質者爲數昔后稷氏
之職黍稷粦粦智者過謀胡盡其地力民日作慝相攸食墨風雨斯蔽連雲岌
嶮飛不得垂喙履不敢仰視旁營萬家地記萌芽赭衣僨蹶而淮水復絕鑄鼎
伏姦能沈于淵吁嗟而求桑林之羞要荒擾馴王會盈庭獻琛效珍物不可枚
陳雞豚以時父恬孫嬉何助邊蔑思屈曲洲島家累千金資先生昔居列仙之
館據要集思謂象以理明妖由人興守諄芒法清寧卻走馬于郊謝重譯之雉
陋三脊之茅熙熙陶陶舒舒天天不言而歲成無營而事貞夫子不云乎一致
而百慮其是之謂乎郢大夫曰汎觀博聞於道彌損願滌耳以挾其蘊

越公孫曰粵昔尼父唯俎豆是數擊刺坐作因民以教蒐苗獮狩車徒卒究厥

今輿圖入表同歷四貉交軌月竊風丘冰天桂海馳心望雲請命款塞千廬星
環入屯山列羽林繡經飛騎鼓笈然而樂成者難與圖事守文者不足語智嘗
聞之兵農同封耕戰同功魚鱗雁行敵莫我敢當府散籍移萬姓流離強帥拉
脇外寇憚肌卒不可拄支後王鑒觀法日以繁龐者罷者恆者羸者駢頭引吮
食粟而嬉開門納兵百郡是師何草廬高吟崎嶇雜耕何杜氏之子傳癖孔深
而緩帶以征射以容觀劍以氣言批亢擣虛孰知其隅折衝壓難莫窮其畔至
若握玄圖視龜文縱橫起止與易象相表裏者驟語之吾懼大夫之疎貽也大
夫曰兵者不祥之器未效此知也

越公孫曰炳靈心君闢乾闥坤情聲相宣立度出均昭昭鴻藻緇縹是存敢先
論楚材而言之漻漻乎形畏垢而將膏也霏霏乎晁承露而欲訴也荒蹊斷葦
燐滅沒而疑聚也織文揚徽攬芳菲而雜組也少焉商飆號鳴金石琮琤逐虎
搏兕韞鵬鏃鷹寄莽蒼於一瞬乘扶搖以孤征終緩轡以就日愴倏淪乎西傾
噫悲何爲哉古有巖居之士抱奇挾幽漱芳深林憩寂凍流憺乎其若遺窈兮

其若留鉤盤助之爲回旋虛牝答之爲獻酬猿三疊而墮淚鶴九轉而凝愁鉤
玄採微迄無終窮瑤席敷張高歌慨慷語初麗而終放託餘韻於宮商然此其
戔戔者耳擲拾蒼雅刮磨誥盤微粲貝編飛英露溥何譏乎肉食之鄙猶鄭穆
而魯桓也大夫不聞之乎鍾石絲竹各隨其聽隆汙有時其所遭者命摩盪堪
輿吸呼羲娥矢爲帝詞叶爲賡歌五嶽贊襄百靈護呵不棘不茨如砥如磨發
潛漏泉掖民陽春瑰逸爲新簡絜爲真列若戶居別若渭分雍容者珩璜冲遠
者英莖縷絕而緒續醴甘而齊清昔之擅名偉著耿兮其不能以十百程也浮
聲切響直意肆志澎湃訇溘滔滔莫止据理者夸飾言者哇嫫母兮姑射鉛刀
兮鏌鋣謗莫任兮奈何大夫曰文章與政通玉署之職也文勝質則史更言其
大者

越公孫曰屹屹中壘校讎靡寧世本年紀繫于麟經捨相府圖書泯其緯經炳
麟金匱汙罔敢配乃司馬氏決榛鋤翳麗者爲譏激者爲刺升涉世家表籍作
紀言諸侯無史史立周圯鄙儒畫墁削章刪凡燭火並日卒澌盡莫傳昂昂荀

袁辭約義完何班范家至耿光綿綿相繼擬述百世一律素王簡編如日在天
熒煌高張孰敢附肩鴻化以漓研探益疲穢者闖者濫者渙浚畏禍希企
市價諂不表直俚不師雅若鼙鼓鍾若盲策馬元經附訛唐歷受呵後有紀略
迄莫同科尹石猛志證古比事百不一試歐陽氏出方名山所藏復大同而小
異勢不兩立其魯史之謂厥今繫牒川盈記注櫛比故志存廢興之源典章酌
損益之致登瑤山而神駭游鄧林而目眯般倅效吁隨和發涕操觚之士吾將
見其心赧而神悸也先生登祕丘覽羣玉積石倉標朱目墨兵筆削融液乎粹
精囿赫胥鄰大庭大夫宜從下風而乞靈也大夫曰皇王惟熙帝霸孔巖我心
增悲韓愈不爲史名以四馳何庸知焉

越公孫曰煌煌古帝別生聚方煥乎陶唐五服正邦五典率常導之無違民用
熙熙授之以時聿來孜孜降于三王厥緒曰孳集成于蒼姬黼黻憲章金石命
令緝熙太和宣昭羣姓纖鉅之備粲乎其有秩也豐殺之制屹乎其有截也三
光重輝百辟拱列歲時易移而浸淫蘖芽弱者綴旒強者鋌戈智者探囊勇者

拔河搏犀象屠蛟鼉飛矢請命旁午係車焱乎浮雲迅乎奔塵炙轂滑稽之士
紛然而並陳棄仁恩假鬼神混君臣各馳騁而懷新數千百年人亡而說具勞
乎離婁不足以一視也蕭乎王良不足以一御也其最大可病者恬泊守真可
以養身不可以治民絕性棄命黔首蠢病孟軻氏有作吾見其髡鉗而舌咋也
言未既郢大夫曰天藏山中瑾瑜匿瑕問以辨之厥德日華儒者詬病卒不能
以勝何道最高子盍陳之毋激毋勦

越公孫曰古昔顓童受業閭塾書數首通訓故是屬聲歌象舞目接身服相親
有恆日用不瀆後帝不相襲緣祀與文八音寥寥五禮紘紘鏗鏘莫明而聚訟
若焚鄭說乖誤後圖踵循象制益湮周官別出議者欲一繁紊綜錯操網而入
林適越而轅北也類禮孔勤五厄莫存後有倣補去取未就卒乘虬驂雲字以
文合聲以音比旁行敷落侏離狄鞮文軌同風不能以致孔壁莫推二經蕃
廡聳牙爲今簡儷爲古謂道統是傳曷敢有語詩基文王而周召先興首章異
同衆說沸騰風雅變言美者爲訾直者爲詆魯頌紀異秦誓告終何後學曹曹

迄莫之通麟魯經議口法吏謂齊晉無褒而日月具刺紛若蠡蜩眇若糠秕
不虛其心不明厥視遺珠抱疑探篋積毀然此特人文之經緯政治之用體也
三聖述作包河總洛二儀生於心萬化制乎神迎之而莫親拒之而彌存疑者
遜者愕者困者湛兮消兮委兮昭兮沈思遺物形離超兮激迴颿兮闐而寥兮
縱雲翱兮憺兮儒先從我招兮郢大夫曰始吾見公孫疲斂若不足突梯若避
辱靡精槁神何斷斷然也今知子矣永譽處矣吾與翰林先生徜徉此土小年
大年猶以爲朝暮也

桡不佞遺謀守儒號東南故家志學之歲先子命繕治書錄觀史志略錄
部第時見舛雜稍長得博考先賢藏書總目矻矻三十年合傳短長乃成
一家承旨程公作藏書山房于麻源三谷命桡賦之遂作七
觀極道源委延祐三年歲在丙辰七月癸丑會稽袁桡誌

嶽麓圖辭二章

嶽司南兮齊紫冥懋陽德兮炳靈二老兮素綦握鴻濛兮矢詞百泉兮一谷醺
爲川兮爲瀆玉霏霏兮日光湛淵默兮含章至言兮在圖同八方兮遂初重華
逝兮不返晝猿啼兮虎當坂

望臺兮靡蕪蹇一士兮拮据百楹兮承宇
嶠山瓢兮以爲醕松風泠兮琅琅儼
振佩兮高岡朱羲出兮揚靈積陰伏兮
大明百泉飲兮在齒懷交流兮不可以
止嗣德兮孔艱清徵激兮回瀾

悠然閣辭

鄱之西兮峯圍圍虎豹屹兮雄姿綬蜿蜒兮紫屬旌駸駸兮虹垂之人兮槃阿
畏羲娥兮高駝築榮觀兮通明手參差兮以娛棟隆兮示背榮翼兮聳喙鑑匯
雪兮鄱之區掾有七兮日醵採鞠兮黃裳緝萸兮紫囊芳冥冥兮夕暉愴獨睎
兮擬所思雲飛英兮山之阜爲予留兮不遐以處秉貞兮神專觴彌劇兮益完
山中之樂不可以久遲予返兮悠然

楊堅州治孟津金堤成作金堤辭

波湯湯齧我堤民昏墊晝負攜地不寧緣木棲楊侯之來承帝則順事陰氣神
以懌赤蛇蜿蜒吸桂漿百谷受令故瀆常彼隰柔桑猗澤維杭侯言神綏曷敢
功民言侯績天心通百妖伏精金石宣明三旬有役金堤是復

石田山房辭

大梁馬伯庸寓居光州作石田山房爲作辭曰

淮斂波兮練繒峯植秀兮翠旌翦黃榛兮布耕石戔戔兮棱棱思夫人兮造攻
雲電合兮追鋒遺鏃兮齧足壤逸休兮果腹神符一兮告祺藹惠則兮貽思靈
之來兮歲祠不鄙夷兮以嬉疏房兮筍席溫風至今靚密儼竹素兮橫陳曰靜
修兮手澤世芬兮日起百稔兮無數石田兮有秋累胼胝兮吾奚以愁謹樹藝
以自勗兮植先德兮無媮離本兮穎豐導泉兮澮通夫豈不知有善歲兮吾曷
敢燕遨以幸逢望八公兮巖巖王孫悄兮莫還積荒幻以自迷兮捨息土而弗
芟衆芳婉其披離兮秋霜慘不能以實謝紫芝之療飢兮治精鑿以煉質亂曰
苗詵詵兮善吾耘兮日出作兮永裕樂兮學猶殖兮吾將以爲則兮

雪江圖辭

雲玄積兮素摩挽義車兮馮河蘆戢戢兮倒戈岡伏匿兮鸛鵲昭朗兮夕徹羣
動寂兮影滅超逍遙兮一舸食穀精兮腹羸地險兮曷憑馬飲波兮夜騰委素

練兮字清舉皓首兮吾奚以屏營

垂綸亭辭

爲宋誠父作

漢滔滔兮日傾東滄浪兮泠泠蹇一士兮沈冥垂芒鉞兮不屑以晷明珥兮貝宮朱蔚兮青蔥魚戢鱗以爲衛兮龍騰章以屏氣謝媚嬖之嘗巧兮口垂沫以縱恣吾寧養之以歲年兮寶祕鬱而不宣豈直鉤以違衆兮守釣道之自然時至而迅舉兮匪荒幻之詭誘保貞志以遂初兮考銘言于耆叟世俗眇其莫同兮永訖依夫前聖之所究

巨峯辭

爲吳成季作

千嶂兮欽崙特峯挺兮絕垠泉交流兮織文粲霄臺兮鱗鱗檜節兮松蘿接路兮以邀儼至人兮清寥休德新兮日昭神曾舉兮重玄大帝儼兮授簡以宣曰渾沌其無迹兮孰爲之傳氣積兮九乾五緯從兮右旋逆知來兮順以往握靈機兮測天狀葆正命兮滅企妄受帝語兮還神京山之下兮雲亭亭澹獨樂兮復丁則泰始兮道甫成

雲中辭

氣芒忽兮孰窮其升淵迴旋兮挾以騰圓爲輪兮直者繩握斂散兮莫名山之
椒兮日暎彼獨黯兮上屯從豐隆兮駿奔需不進兮惛惛下土兮垢氛靈夷猶
兮曷存炯余視兮屏息桂酒酌兮瑤席法玄化兮以康食神功昭兮奚以跡衆
甫集兮粹精愴將逝兮廓清

春雨辭

玄陰固兮內凝滄蒼蔚兮溟沐興注兮建瓴疾兮灑兵下土兮沃焦謦徜徉兮
紫霄來弗以趾兮去莫可招澹幽士兮空山息視聽兮玉顏帝青廓兮籟沈虛
牝汨兮潺湲謂彼有聲兮耳益以聵疑不釋兮詢于大塊

義婦辭

東平孫珪
妻盧氏

彼棖煌煌兮過者式之黯予心之初兮孰或測之紡兮于房伊雛孔傷饋兮于
堂我姑永望余不聊生兮矢神告之歲月遷流兮卒乃復之鸞鏘兮飛鵠松柏
茂兮朝露沫石可泐兮志莫虧儼舜英兮介壽祺